

SKIPULAGSSKRÁ

fyrir Orgelsjóð Ingjaldshólskirkju - Jóhönnusjóð.

1. gr.

Kvenfélag Hellissands stofnar hér með Orgelsjóð Ingjaldshólskirkju - Jóhönnusjóð með eftirfarandi skipulagsskrá.

2. gr.

Sjóðurinn heitir Orgelsjóður Ingjaldshólskirkju - Jóhönnusjóður. Sjóðurinn er stofnaður í minningu Jóhönnu Vigfúsdóttur, sem var organisti í Ingjaldshólssókn 1928-1980. Heimili sjóðsins og varnarþing er í Snæfellsbæ. Orgelsjóður Ingjaldshólskirkju - Jóhönnusjóður tók til starfa sem sjálfstæð stofnun 7. maí 1994.

3. gr.

Tilgangur sjóðsins er að safna fyrir og kaupa pípuorgel í Ingjaldshólskirkju og til viðhalds á því.

4. gr.

Stjórn sjóðsins er skipuð þremur mönnum: Einum fulltrúa frá Kvenfélagi Hellissands sem er formaður sjóðsins, einum tilnefndum af kór Ingjaldshólskirkju og einum fulltrúa afkomenda Jóhönnu Vigfúsdóttur og Hjartar Jónssonar frá Munaðarhóli. Stjórn sjóðsins ber ábyrgð á varðveislu hans og skal sjá til þess að endurskoðaðir reikningar sjóðsins séu sendir Ríkisendurskoðun eigi síðar en 30. júní ár hvert. Sjóðsstjórnin tilnefnir endurskoðanda. Reikningsár sjóðsins er almanaksárið.

5. gr.

Stofnfé sjóðsins eru frjáls framlög, gjafir og söfnunarfé sem lagðar hafa verið í sjóð til orgelkaupa í Ingjaldshólskirkju, þar af skal bundið í stofnfé 455.000 kr.

6. gr.

Tekjur sjóðsins eru frjáls framlög, tekjur af tónleikum, kaffisölu og annað fé sem sjóðnum hlotnast. Sjóðnum er heimilt að ráðstafa öllu því fé sem safnast og tekjum sjóðsins skal einungis varið til kaupa á orgeli í Ingjaldshólskirkju og viðhalds þess.

7. gr.

Sóknarnefnd Ingjaldshólskirkju skal árlega fá upplýsingar um stöðu sjóðsins fyrir safnaðarfund.

8. gr.

Stofnunin ber ábyrgð á skuldbindingum sínum með þeim eignum sem safnast hafa og munu safnast í orgelsjóð.

9. gr.

Heimilt er að breyta skipulagsskrá þessari með samþykkt meirihluta stjórnar. Tillaga um að leggja sjóðinn niður verður því aðeins gild að hún hljóti stuðning allra stjórnarmanna. Verði sjóðurinn lagður niður skulu eignir hans renna til eflingar tónlistarstarfs á Hellissandi, að ákvörðun sjóðsstjórnar.

10. gr.

Leita skal staðfestingar dómsmálaráðherra á skipulagsskrá þessari.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytinu, 5. nóvember 1996.

F. h. r.

Þorsteinn Geirsson.

Fanney Óskarsdóttir.

Nr. 585

31. október 1996

AUGLÝSING

um umferð á Ísafirði.

Að fengnum tillögum bæjarstjórnar Ísafjarðar og samkvæmt heimild í 81. gr. umferðarlaga nr. 50/1987 eru hér með settar eftirfarandi reglur um umferð á Ísafirði:

Akstursstefnu Hafnarstrætis og Aðalstrætis frá gatnamótum Mánagötu, Pollgötu og Hafnarstrætis að gatnamótum Aðalstrætis og Pollgötu er breytt þannig að ekið verður niður Eyrina í austur- og suðurátt. Einstefna verður áfram á umræddum kafla Hafnarstrætis og Aðalstrætis en hún snýst nú við.

Bannað er að leggja bifreiðum í Hafnarstræti milli Mánagötu og Hrannargötu. Akstur frá Mánagötu yfir á Pollgötu er bannaður.

Reglur þessar, sem settar eru samkvæmt 81. gr. umferðarlaga nr. 50/1987, öðlast gildi þann 1. desember 1996.

Úr gildi fellur 13. tl. III. kafla auglýsingar um umferð á Ísafirði nr. 189/1993, svo og allar aðrar reglur um umferð í kaupstaðnum, er kunna að hafa verið settar og brjóta í bága við reglur þessarar auglýsingar.

Lögreglustjórinn á Ísafirði, 31. október 1996.

Ólafur Helgi Kjartansson.

Nr. 586

4. nóvember 1996

GJALDSKRÁ

fyrir hundahald í Hrísey.

1. gr.

Þeir sem fá heimild til að halda hund, sbr. 2. gr. staflíð g, samþykktar um hunda- og kattahald í Hrísey nr. 533/1996, skulu árlega greiða fyrir það kr. 6.000 í sveitarsjóð.

Gjaldið greiðist fyrirfram fyrir allt tímabilið með gjalddaga 1. janúar og eindaga 15. febrúar. Dráttarvextir reiknast frá gjalddaga verði gjaldið eigi greitt í síðasta lagi á eindaga. Hafi gjald eigi verið greitt innan tveggja mánaða frá gjalddaga fellur leyfið úr gildi.